

26/12/1999

Parlimen bukan tempat melawak

MINGGU ini ingatan Kiau balik ke zaman Kiau budak-budak dulu. Waktu itu, peristiwa yang Kiau tunggu-tunggu ialah kedatangan sarkas ke kampung Kiau.

Zaman itu, sarkaslah peristiwa yang paling menakjubkan. Haiwan ganas diajar bermacam kepandaian. Manusia bergayutan seolah-olah boleh terbang. Orang naik motosikal dalam sfera besi. Orang makan api dan macam-macam lagi.

Apabila hati kita berdebar dan kita rasa macam nak pitam, tiba-tiba keluar si badut yang membuat kita ketawa sampai senak perut.

Yang buat ingatan Kiau kembali kepada sarkas ialah peristiwa huru-hara yang terjadi di Parlimen Isnin lalu apabila Ahli Parlimen pembangkang berarak keluar masuk Dewan dan buat heboh.

Ini diikuti pula dengan Ahli Parlimen tidak hadir sidang atau tidak masuk Dewan apabila persidangan berjalan.

Kedua-dua kejadian ini cukup teruk hingga Perdana Menteri sendiri kena campur tangan.

Ahli Parlimen pembangkang buat bising dalam Dewan, bantah itu dan ini sebelum pun mereka angkat sumpah jawatan. Nampak sangatlah mereka ini desperate dan tak faham peraturan.

Kalau nak bangkang, nak berhujah pun tunggulah sampai sah jadi Ahli Yang Berhormat (AYB) dulu. Tapi akhirnya mereka angkat sumpah juga. Untuk tutup malu mereka kata mereka angkat sumpah dengan bantahan.

Bantah tak bantah, protes tak protes angkat sumpah angkat juga. Macam budak-budak merajuk. Kalau dibagi ais krim dia ambil juga.

Itu AYB pembangkang.

AYB kerajaan pula banyak yang ponteng atau tidak masuk Dewan sampai Datuk Seri Dr Mahathir Mohamad kena bagi amaran keras.

Satu saja Kiau boleh kata pasal AYB macam ini - tak sedar untung nasib. Baru saja menang, itu pun dengan kelebihan suara yang kecil, mereka sudah lupa daratan, lupa tanggungjawab.

Kiau cabar 'whip' BN supaya dedahkan nama AYB yang ponteng itu supaya pengundi dan rakyat jelata tahu. Ini saja cara ajar mereka.

Kalau mereka ada maruah, mereka minta maaf kepada ketua parti mereka iaitu Dr Mahathir dan kepada pengundi yang mereka sia-siakan.

Dulu bolehlah mereka main ponteng-ponteng pasal pembangkang tak kuat. Itu pun tidak amanah juga pasal tugas mereka memang mewakili rakyat dalam Parlimen, bukan seronok-seronok di Kuala Lumpur atau setakat hendak dapatkan elaun persidangan.

Sekarang lagi berat pasal wakil pembangkang tambah banyak. Tapi kalau mereka terus ponteng juga atau pandang remeh perdebatan dalam Dewan, Kiau minta Dr Mahathir pecat mereka atau kalau mereka ini ada harga diri, mereka sendiri letak jawatan.

Parlimen bukan sarkas. Ia tempat yang mulia. Tempat undang-undang dibahas dan dipersetujui. Bukan tempat buat kelakar, menyorak dan mengejek orang atau walk-out apabila tak setuju.

Kiau minta jadilah AYB yang arif dan bijaksana. Jadilah pendebat dan pembahas yang berwibawa. Kalau nak buat kelakar, masuklah kumpulan lawak atau sarkas jadi badut.

Minta maaflah kalau Kiau kasar sikit. Kiau cuma nak ingatkan AYB BN yang kemenangan mereka kali ini tipis dan rakyat akan buat penilaian sekali lagi dalam masa empat-lima tahun akan datang.

Mereka kena ingat pengundi akan datang bertambah ramai dan banyak pula

daripada golongan muda dan terpelajar. Mereka lebih faham dan lebih tahu apa yang berlaku dalam Parlimen.

Kalau betul perkiraan Kiau, menjelang tahun 2004 atau 2005, pengundi baru akan bertambah sekurang-kurangnya dua juta. Macam mana kita nak dapatkan sokongan mereka kalau sidang Parlimen pun ponteng.

Kiau mintalah pada AYB dan semua yang bernasib baik dilantik jadi Menteri, Timbalan Menteri dan Setiausaha Parlimen supaya bekerja kuat. Berjinak-jinaklah dengan pengundi muda dan berusaha tarik sokongan mereka. Jangan bila sampai pilihan raya baru terkam sini, terkam sana cari sokongan.

Kerjalah dari sekarang dan kerjalah dengan tekun, ikhlas dan cekap. Kita pun dah jelak dengan AYB yang cakap tak serupa bikin.

(END)